

Svi časni građani u solidarnosti sa ožalošćenima

Ljudi dobre volje širom Bosne i Hercegovine solidarišu se sa hiljadama članova porodica koje su u genocidu u Srebrenici izgubili svoje najmilije, rekao je danas visoki predstavnik Valentin Inzko prije prisustvovanja ceremoniji obilježavanja 19. godišnjice masakra.

„Širom zemlje, u svim zajednicama, građani se prisjećaju onih koji su ubijeni u Srebrenici u julu 1995. godine. Pokazati saosjećanje i solidarnost sa ožalošćenima normalna je reakcija časnih ljudi“.

„Ovdje u Srebrenici, u ovom uzvišenom trenutku, svjedočimo novom ukopu žrtava čiji su posmrtni ostaci identifikovani“, rekao je visoki predstavnik. „Poštivanje prava na dostojanstven ukop staro je koliko i civilizacija – i to razlikuje ljudska bića od ostalih stvorenja“.

„I dok se prisjećamo nevinih žrtava Srebrenice i svih nevinih žrtava sukoba u Bosni i Hercegovini, naša je dužnost da obnovimo obećanje dato živima, da obnovimo opredijeljenost prema poštivanju prava svih građana BiH da žive i rade dostojanstveno, da žive bez straha, bez materijalne oskudice – jer jasno je da ova prava nisu još uvijek u potpunosti osigurana“.

Visoki predstavnik je pozvao političke i vjerske lidere u BiH da uvažavaju poseban i užasan karakter genocida u Srebrenici i da priznaju stalnu patnju svih onih koji su u sukobu u Bosni i Hercegovini izgubili svoje najmilije.